



Rufo Wever, e pionero di musica y cultura Arubano

DIA 30 di december 2015, nos ta recorda 38 aña di fayecimento di e gran compositor y musico Arubano, Rufo Wever.

Un dia prome cu aña bieu 1977 a drenta e tristo noticia cu pa motibo di un 'longontsteking', e genio musical Rufo Wever a bay laga nos. Un delegacion a biaha di Corsou bou di guia di Gobernador di Antias, Drs. Ben Leito p'e entiero cu a tuma lugar dia 2 di januari 1978, bou di e tononan di e Orkesta Arubano Sinfonico.

December tabata un luna hopi special den bida di Rufo. El a nace riba 8 di december y el a fayece riba 30 di december. Pero tambe tabata den e luna aki cu su talento musical a wordo descubri ora el a haya un mondharmonica di regalo. E dianan di fiesta di fin di aña tabata hopi special, pasobra hopi musico tabata bin bishita Rufo na su cas na Wilhelminastraat 33 y cada un

a pasa man pa nan instrumento preferi y tabata cuminsa toca.

Rufo su importancia den historia di musica Arubano por wordo poni den cinco categoria:

1. E calidad di Rufo su composicionnan ta di nivel hopi halto. Esaki por wordo scucha no solamente den su walsnan, pero tambe den e variedad di diferente tipo di musica manera mazurka, tumba y danza.

2. E cantidad di composicion. En total un 400, di cual 100 ta composicionnan completo pa orkesta of tambe pa wordo toca cu piano, guitarra of saxofon. Hopi artista, gruponan tipico y tambe orkesta a graba e composicionnan. Mayoria di Rufo su composicionnan ta instrumental.

3. Rufo tabata e prome musico contemporaneo

conoci cu a compone y cu su composicionnan ainda ta wordo graba. E prome composicion di Rufo ta e inmortal wals Arubanita, cu a wordo componi na aña 1935 y a bira un composicion di importancia historico pa Aruba. E aña aki e composicion a cumpli 80 aña y te ainda ta ser scucha frecuentemente den diferente version.

4. Rufo Wever tabata un musico completo. Esaki tabata encera cu e tabata toca diferente instrumento manera saxofon, acordeon, piano, guitarra, cuarta y clarinet. Rufo tabata un compositor y arreglista. E tabata lesa y skirbi musica.

5. Ademas, Rufo tabata e prome persona na Aruba cu a cuminsa traha e cilindernan p'e caha di orgel y el a sigui haci esaki pa 33 aña.

Aki ta sigui un minibiografia di e talentoso Rufo Wever:

Dia 8 di december 1917, Rufo Inocencio Wever a nace na Wilhelminastraat 33, Aruba. E prome yiu di e matrimonio di Maria Annette Lampe

Babijn y Civiles Marcial Wever Everts.

E pareha a bin di famianan acomoda y Civiles tabata un contratista, constructor di edificionan, di barconan y ebanista.

Civiles tabatin un mente tecnico, pero tambe tabata gusta musica y tabata toca clarinet y cuarta.

Net prome cu Rufo a cumpli 6 aña, el a haya un sinfonia di regalo y den un par di dia el a sorprende su famia cu e por a toca un cantica cu tabata na moda e tempo ey su mes y sin ningun ayudo. Su tata a keda masha impresiona y entusiasmo. Mesora el a cumpra un piano y a contrata e conocido maestra di musica di Corsou, Shon Shishi Rodriguez Timmer pa duna Rufo les. Sra. Rodriguez a cuminsa siña Rufo e conocimiento di musica en general. Manera cu Rufo a haya e piano, e mes tabata practica riba dje.

Tempo cu Rufo tabatin 10 aña, su tata a fayece y a laga Rufo y su tres rumannan huerfano. Su mama Annette, un dama di caracter fuerte y semper cu un conducta corecto, a sigui e lucha pa hiba su famia dilanti. Aki el a haya e sosten financiero di su famia.

Cu su 12 aña, e por a toca piano na un manera admirabel. Tambe el a siña su mes con pa toca e saxofon, guitarra, cuarta, clarinet y otro instrumentonan ritmico.

Y or’e tabatin 15 aña, el a lanta e orkesta musical Melody Band, hunto cu su amigonan: Tom Lampe (violin), Wewe Croes (violin), Boysie Lampe (violin), Twai Croes (trompet), Clemente Lacle (drum), y Rufo na piano. Despues el a uni n’e grupo di Padu Lampe, su primo segundo, y aki a cuminsa un bunita amistad.

Na 1935, inspira dor di e famoso compositor y cantante Argentino Carlos Gardel, kende a bishita Aruba e aña ey y cu kende Rufo a hay’e oportunidad di presenta cu ne, Rufo a lanta su grupo di tango Los Trovadores Tropicales, hunto cu su amigonan: Clemente Lacle (cantante) y guitaristanan Harold Hopmans, Carlos Booi, Jan Croes y Shemmi Coronel. Los Trovadores Tropicales tabata e prome grupo musical di Aruba cu a toca na e radio di Corsou, Radio Curom.

Inicio como compositor

Aña 1935 tabata uno di hopi significacion pa historia musical di Aruba. Na edad di 18, Rufo a compone su prome wals Arubanita. Y e composicion aki a cuminsa un era di composicionnan Arubano moderno. E composicion aki a bira asina conoci y gusta cu

te dia di awe, despues di 80 aña, e ta sigui ta un di e composicionnan mas toca den historia musical di Aruba. El a wordo toca y graba pa un variedad di artistanan y por wordo tendi cu hopi frecuencia na radio y television. E tabata e prome wals Arubano y Antiano cu un miembro di Cas Real, Reina Juliana, a balia riba dje.

E composicion di Arubanita tin su significacion historico y cultural pa Aruba, pasobra ta e prome composicion cu su autor ta wordo conoci p’e y cu te ainda ta wordo graba y toca.

Despues di su prome composicion a sigui composicionnan cu un sabor picante: Encantadora, su segundo composicion y un wals di tres parti Annette, un wals di tres parti dedica na su mama Aruba, un wals bunita y elegante cu ta representa e dignidad di e pueblo di Aruba. Antillenhuis, cual el a dedica n’e Minister Arubano y su gran amigo Wim F. M. Lampe.

E amor cu Rufo tabatin pa su isla ta obvio mirando cuanto biaha el a uza e number di Aruba: E wals Arubanita y Aruba, e himno Aruba Dushi Tera, e tumba Aruba Tera Bunita, Mambo di Aruba, y wals Mi Aruba Stima.

Tambe tabatin algun composicion cu su gran amigo y colega Padu Lampe. E tumba Chanita cu letra di Hubert Booi, e incomparable calypso Carnaval di aña 1954 cu a bira famoso cu e cantante Edwin Zichem, y naturalmente nos himno nacional Aruba Dushi Tera, composita na 1953 y graba pa prome biaha den version di orkesta na Venezuela p’e orkesta di Don Anibal Abreu.

Un don musical

Compone tabata algo facil pa Rufo. Un total di mas o menos 400 composicion a sigui. Di esaki 100 ta composicionnan completo pa piano of orkesta y 300 ta composicionnan y areglo pa caha di orgel. Rufo su composicionnan ta inclui: wals, tumba, bolero, zamba, mambo, porro, merengue, danza, mazurka, polka y calypso. Ademá di compositor, Rufo tabata areglista y e tabata haci tur e areglonan su mes.

Semper Rufo tabatin un of otro melodia den su cabes. P’esei tabata wordo existi di e muchanan di famia pa no haci ningun ruido, pasobra esaki por causa cu Rufo ta perde e melodia di e composicion cu e tabata bezig cu ne.

Den un entrevista haci na 1968, a puntra Rufo cua di tur su composicionnan ta su favorito. E contesta tabata rapido, e wals Encantadora! Na edad di 21 aña, Rufo a cuminsa cu e trabou

di caha di orgel. Awe nos ta conoce mas o menos 118 aña di musica di caha di orgel na Aruba, pero Rufo tabata e prome persona cu a cuminsa traha e cilindernan p’e caha di orgel na Aruba y el a haci esaki pa 33 aña. Anteriormente e cilindernan tabata bai Corsou. E hecho aki tambe ta duna Rufo Wever un lugar especial den historia di musica folklorico di Aruba. Pa hopi di e composicionnan cu Rufo a haci pa caha di orgel el a uza e number artistico A. N. Tillano. Den historia di musica di caha di orgel por wak e nomber aki ta aparece na hopi caminda y hopi hende no sa cu esaki ta Rufo mes.

Na 1941, un accidente grave a laga Rufo sin su brasa robes. Apesar di e tragedia aki el a supera esaki y el a keda compone y toca piano cu un brasa artificial cu e mes a diseña y traha p’e na Alemania. Despues el a haya cu esaki tabata mucho pisa p’e por a toca piano, e mes a traha uno na Aruba uzando tasnan di cuero di scol cu no tabata wordo uza mas.

Y dia 30 di december 1977, Rufo su salud a bai atras y el a fayece di un ‘longontsteking’. Aruba y Antias a perde un di su musiconan mas grandi, e pionero di e musica y cultura moderno di Aruba. Awe ta cumpli 38 aña cu el a bai laga nos, pero e herencia cultural cu el a laga atras p’e isla cu tanto el a stima lo keda den nos bida y alma cada biaha cu nos tende e tononan vibrante di su musica.

Aki ta sigui un lista di su composicionnan:

Wals: Arubanita, Encantadora, Llorando, Mis Penas, Padu del Caribe, Glenda y Herbert, Flamingo Room, Aruba, Pensando en Ti, Emelina, Dulce, Pensamiento, Preciosa, Bonita, Palomita, Biba Pasco, Violeta, Trupial, Chuchubi, Solo Solo, Bandolero, Antillenhuis, Annette, El Libertador, Suavidad, y Belinda

Tumba: Paranderos, Awa Blauw, Tienda Nobo, Den Steef, Bam Zoya, Compa Nanzi, Sucu Dushi, Giambo Bieuw, Ta M’a Bula e Waya, Ring Ring, Coba Pos, Mi Oloshi, Mes Ora, Pan Cayente, Aruba Tera Bunita, Tumba Pa Gozar, Sabrosita, Calientito, Bitter Bai, y Pikitin Pikitin

Bolero: Te quiero, Algun Dia Sere Feliz, y Gracias Amigo
Zamba: Boom, Boom, Boom
Mambo: Mambo de Aruba
Porro: Marinero
Merengue: Nenita Bonita, Merengue Popular, Wega Bala, Galiña, Me Gusta Mas, Pura Candela
Mazurka: Revuelta, Alegria, y Curacao
Polka: Fiesta, Gasta Dek, y Gozando
Calypso: Carnaval, y Pimienta
Danza: Danza Alegre